



## გ ა ნ ჩ ი ნ ე ბ ა

საქართველოს სახელით

08 აპრილი, 2011 წელი

ქ. თბილისი

### თბილისის სააპელაციო სასამართლოს ადმინისტრაციულ საქმეთა პალატა

#### მოსამართლე – მანანა ჩოხელი

**აპელაციი –** საქართველოს განათლებისა და მეცნიერების სამინისტროს სსიპ თბილისის პროფესიული სწავლების ცენტრი „სპექტრი“;

**მოწინააღმდეგე მხარე –** მერი ჩაკაბერია;

**დავის საგანი –** ქმედების განხორციელების დავალება

**გასაჩივრებული გადაწყვეტილება –** სოხუმისა და გაგრა-გუდაუთის რაიონული სასამართლოს 2010 წლის 21 ოქტომბრის გადაწყვეტილება

**ზეპირი მოსმენის გარეშე განიხილა სასამართლო შეტყობინების საჯაროდ გავრცელების საკითხი და**

#### გ ა მ თ ა რ კ ვ ი ა :

სოხუმისა და გაგრა-გუდაუთის რაიონული სასამართლოს 2010 წლის 21 ოქტომბრის გადაწყვეტილებით მერი ჩაკაბერიას სარჩელი დაკმაყოფილდა: მოპასუხე საქართველოს განათლებისა და მეცნიერების სამინისტროს სსიპ თბილისის პროფესიული სწავლების ცენტრ „სპექტრს“ დაევალა მერი ჩაკაბერიას სახელზე გაეცა დიპლომის დუბლიკატი, შემდეგი მონაცემებით – მერი ჩაკაბერიამ 1967 წელს დაამთავარა ქ. სოხუმის პეტრე ჭაფარიძის სამედიცინო სასწავლებელი, მედდის სპეციალობით.

გადაწყვეტილება სააპელაციო საჩივრით გაასაჩივრა მოპასუხე მხარემ – საქართველოს განათლებისა და მეცნიერების სამინისტროს სსიპ თბილისის პროფესიული სწავლების ცენტრმა „სპექტრი“, რომელმაც მოითხოვა გადაწყვეტილების გაუქმება და საქმის ხელახლა განსახილველად დაბრუნება.

თბილისის სააპელაციო სასამართლოს ადმინისტრაციულ საქმეთა პალატის 2011 წლის 16 მარტის განჩინებით სააპელაციო საჩივარი დაკმაყოფილდა, გაუქმდა სოხუმისა და გაგრა-გუდაუთის რაიონული სასამართლოს 2010 წლის 21 ოქტომბრის გადაწყვეტილება და საქმე ხელახლა განსახილველად დაუბრუნდა იმავე სასამართლოს.

თბილისის სააპელაციო სასამართლო მიიჩნევს, რომ მოწინააღმდეგე მხარეს – მერი ჩაკაბერიას სასამართლო განჩინების თაობაზე უნდა ეცნობოს საჯარო შეტყობინების საშუალებით, შემდეგ გარემოებათა გამო:

დადგენილია, რომ თბილისის სააპელაციო სასამართლოს გზავნილები (უწყება, სააპელაციო საჩივარი, განჩინება) მერი ჩაკაბერიას არ ჩაბარდა სასარჩელო

განცხადებაში და სააპელაციო საჩივარში მითითებულ მისამართზე – თბილისი, ვარკეთილი 3, II მ/რ, №204 ბაგა-ბალი, II სართული.

საქართველოს ადმინისტრაციული საპროცესო კოდექსის პირველი მუხლის მე-2 ნაწილის თანახმად, თუ ამ კოდექსით სხვა რამ არ არის დადგენილი ადმინისტრაციულ სამართალწარმოებაში გამოიყენება სამოქალაქო საპროცესო კოდექსის დებულებანი. საქართველოს სსკ-ის 369-ე მუხლის პირველი ნაწილის თანახმად, დასაბუთებული გადაწყვეტილების გადაცემის მომენტად ითვლება დასაბუთებული გადაწყვეტილების ასლის მხარისათვის ჩაბარება სსსკ-ის 70-78 მუხლების შესაბამისად.

საქართველოს სამოქალაქო საპროცესო კოდექსის 78.1-ე მუხლის თანახმად, თუ მხარის ადგილსამყოფელი უცნობია ან მისთვის სასამართლო უწყების ჩაბარება სხვაგვარად ვერ ხერხდება, სასამართლო უფლებამოსილია გამოიტანოს განჩინება სასამართლო შეტყობინების საჯაროდ გავრცელების შესახებ. სასამართლო შეტყობინება საჯაროდ ვრცელდება შესაბამისი სასამართლოს შენობაში თვალსაჩინო ადგილზე ან გებგვერდზე განთავსებით, ან დაინტერესებული მხარის მოთხოვნის შემთხვევაში, მისივე ხარჯებით იმ გაზეთში, რომელიც მასობროვადაა გავრცელებული მხარის საცხოვრებელი ადგილის შესაბამის ადმინისტრაციულ-ტერიტორიულ ერთეულში, ან ინფორმაციის სხვა საშუალებებში გამოქვეყნებით.

თბილისის სააპელაციო სასამართლოს ადმინისტრაციულ საქმეთა პალატა მართლზომიერად მიიჩნევს, მოწინააღმდეგე მხარეს – მერი ჩაკაბერიას თბილისის სააპელაციო სასამართლოს ადმინისტრაციულ საქმეთა პალატის 2011 წლის 16 მარტის განჩინების შესახებ ეცნობოს საჯარო შეტყობინების საშუალებით – თბილისის სააპელაციო სასამართლოს ვებგვერდზე განთავსებით.

სააპელაციო პალატამ იხელმძღვანელა საქართველოს ადმინისტრაციული საპროცესო კოდექსის პირველი, საქართველოს სამოქალაქო საპროცესო კოდექსის 369-ე, 372-ე, 78-ე და 284-ე მუხლები და

## დ ა ა დ გ ი ნ ა:

1. მოწინააღმდეგე მხარეს – მერი ჩაკაბერიას სასამართლო შეტყობინების საჯაროდ გავრცელების საშუალებით ეცნობოს თბილისის სააპელაციო სასამართლოს ადმინისტრაციულ საქმეთა პალატის 2011 წლის 16 მარტის განჩინების შესახებ, რომლითაც საქართველოს განათლებისა და მეცნიერების სამინისტროს სსიპ თბილისის პროფესიული სწავლების ცენტრი „სპექტრის“ სააპელაციო საჩივარი დაკმაყოფილდა, გაუქმდა სოცუმისა და გაგრა-გუდაუთის რაიონული სასამართლოს 2010 წლის 21 ოქტომბრის გადაწყვეტილება და საქმე ხელახლა განსახილველად დაუბრუნდა იმავე სასამართლოს; განჩინება შეიძლება გასაჩივრდეს საკასაციო წესით საქართველოს უზენაესი სასამართლოს ადმინისტრაციულ საქმეთა პალატაში (მდებარე, თბილისი, ძმები ზუბალაშვილების ქ. №32), დასაბუთებული განჩინების მხარეთათვის გადაცემიდან ერთი თვის ვადაში, თბილისის სააპელაციო სასამართლოს (მდებარე, თბილისი, გრ. რობაქიძის გამზ. №7ა) მეშვეობით;
2. სასამართლო შეტყობინება განთავსდეს თბილისის სააპელაციო სასამართლოს ვებგვერდზე;
3. განჩინება არ გასაჩივრდება.

მოსამართლე

მანანა ჩოხელი